

AWIG-AWIG
DESA PAKRAMAN BANGKIANG SIDEM



DESA GUNUNGSALAK
KECAMATAN SELEMADEG
KABUPATEN TABANAN
WARSA 2003

MURDDHA CITTA	1
PRATHAMAS SARGAH ARAN LAN WEWIDANGAN DESA	1
DWITIIYAS SARGAH PATITIS LAN PAMIKUKUH	2
TERTIIYAS SARGAH SUKERTAN TATA PAKRAMAN	2
Palet 1 Indik Krama	2
Palet 2 Indik Prajuru lan Dulun Desa	4
Palet 3 Indik Kulkul	5
Palet 4 Indik Paruman	7
Palet 5 Indik Druwen Desa	8
Palet 6 Sukerta Pamitegep	9
Kaping 1 Karang, Tegal lan Carik	9
Kaping 2 Pepayonan	9
Kaping 3 Wewangunan	10
Kaping 4 Wewalungan	10
Kaping 5 Bhaya	11
Kaping 6 Panyanggran Krama Desa	11
CATURTHAS SARGAH SUKERTAN TATA AGAMA	12
Palet 1 Indik Dewa Yajnya	12
Palet 2 Indik Resi Yajnya	14
Palet 3 Indik Pitra Yajnya	15
Palet 4 Indik Manusa Yajnya	17
Palet 5 Indik Bhuta Yajnya	17
PANCAMAS SARGAH SUKERTAN TATA PAWONGAN	18
Palet 1 Indik Pawiwahan	18
Palet 2 Indik Nyapihan	19
Palet 3 Indik Sentana	19
Palet 4 Indik Warisan	19
SASTHAS SARGAH WICARA LAN PAMIDANDA	20
Palet 1 Indik Wicara	20
Palet 2 Indik Pamidanda	20
SAPTAMAS SARGAH NGUWAH-UWUHN AWIG-AWIG	21
ASTAMAS SARGAH S A M A P T A	22
LEPIHAN : I TETINASAN NYASA LAN SASANTI	24
LEPIHAN : II PANITIA PERUMUS LAN PANYURATAN AWIG-AWIG	25

Sembah bakti miwah pangastawan titiang majeng ring paduka Bhatara-Bhatari sesuwunan titiang sami, riantukan wantah malarapan panghyangning kalih paswecan Ida Sang Hyang Widhi Wasa esung kertawaranugraha nyresti jagat jangkep rawuhing sadagingnya sami, mawinan wenten kahuripan sekala niskala ring Bhuwana Agung miwah ring Bhuwana Alit.

Manut dresta, Desane kamanggehang dados pasayuban Krama Desa rawuhing kulawarga pawongannya sami, mawastu raris Desane kamanggehang pinaka pawakan Bhuwana Agung, pawongannya kamanggehang pinaka pawakan Bhuwana Alit.

So'aning pawakan Bhuwana Agung, Desane taler kamanggehang pinaka pawakan bhawa mahurin, sane kacirenin antuk wentene pakilit Tri Hita Karana sane nenten dados pasahang, luwire :

ha. Parhyangan, inggih punika : sahanan parhyangan panyiwian Desa genah ngarcana bhawan Ida Sang Hyang Parama Wisesa, pinaka jiwana Desane;

na. Paworagan, inggih punika : gebogan Krama rawuhing warga Desa maka sami pinaka bayu pramanan Desane, mawinan Desane prasida maolah prawreti;

ca. Palemahan, inggih punika : sahananing pakarangan, tegal, carik miwah setra sakewuwuban wewidangan Desa Adat puniki, pinaka sthulan Desane.

Adung patemoning Bhuwana Agung ring Bhuwana Alit, maka larapan ngupadi santa jagadhdhita, punika sinanggeh murdhaning prayojana pangriptaning awig-awig iki, rikala pasahan mami Krama Desa Pakraman Bangkian Sidem, pinaka sepat siku-siku pamatut miwah pamutus, wastu kasidan prayojanan mami kabeh, prasama angidep muwah amagehaken linging awig-awig, kadi ring sor iki.

PRATHAMAS SARGAH

ARAN LAN WEWIDANGAN DESA.

Pawos 1

- (1) Desa Pakraman puniki, mawasta Desa Pakraman Bangkian Sidem.
- (2) Jebar kekuwub wewidangannya mawates nyatur desa, inggih punika :
 - ha. Sisi wetan : Tukad Lambuk;
 - na. Sisi kidul : Desa Pakraman Gunungsalak;
 - ca. Sisi kulon : Pangkung Bunuhan;
 - ra. Sisi lor : Desa Pakraman Apit Yeh.
- (3) Jebar kekuwub wewidangan sane kawengku antuk wates-wates inucap, wenten : 50,00 Ha.
- (4) Sane kamanggehang ngranjing dados kekuwub wewidangan Desa Pakraman puniki, manut dresta, luwire :
 - ha. Pupulan karang paumahan sane sinanggeh Palemahan Desa Pakraman;
 - na. Setra, carik miwah tegal sane wenten ring kekuwub wewidangan Desa Pakraman puniki sajabaning Palemahan Desa Pakraman, manggeh ngranjing dados Tejakan Desa Pakraman Bangkian Sidem.

- (5) Desa Pakraman puniki, kawangun antuk asiki Banjar , inggih punika : Banjar Bangkiang Sidem.
- (6) Awig-awig, Pararem miwah sahanan Pasuaran Desa, manggeh kajejerang ring jebar-kekuwub wewidangan Desa Pakraman puniki sami.

DWITIYAS SARGAH

PATITIS LAN PAMIKUKUH

Pawos 2

Desa Pakraman Bangkiang Sidem, ngamanggehang pamikukuh, minakadi :

- (1) Pancasila.
- (2) Undang-Undang Dasar 1945, pamekas pasal 18.
- (3) Tri Hita Karana, manut sadacara Agama Hindu.

Pawos 3

Luwir Patitis Desa Pakraman Bangkiang Sidem :

- (1) Mikukuhin miwah ngrajegang Sang Hyang Agama.
- (2) Nginggilang tata prawretine maagama.
- (3) Ngrajegang kasukertan Desa saha Pawongannya sekala lan niskala.

TRTIYAS SARGAH

SUKERTAN TATA PAKRAMAN

Palet 1

Indik Krama

Pawos 4

- (1) Sahananing sang jenek mapaumahan ring wewengkon wewidangan Desa Pakraman Bangkiang Sidem, sinanggeh warga Desa Pakraman Bangkiang Sidem.
- (2) Warga Desa inucap ring ajeng, linggihnyane wenten 2 (kalih) soroh :
 - ha. Warga Desa sane maagama Hindu tur sareng nyungkemin Kahyangan Desa Pakraman Bangkiang Sidem, sinanggeh Krama Desa Pakraman Bangkiang Sidem.
 - na. Sajaba punika, sinanggeh Krama Tamiu, sane kasulurang manut Pararem.

Pawos 5

Dasar Pakraman :

- (1) Sahanan Warga Desa sane sampun marabian, patut ngawit dados Krama Desa.

- (2) Satunggil Krama, manut karendahan kulawargannya, patut keni sinalih tunggil ayah-ayah:
 - ha. Ayahan Ngarep;
 - na. Ayahan Balu;
- (3) Sesengker ngawit tedun ngayah:
 - ha. Marep ring Krama Desa sane mawit saking pawiwahan, tigang sasih saking puput makala-kalaan.
 - na. Marep ring Krama Desa sane mawit saking ngarangin, kasulurang manut Pararem.
- (4) Krama Desa sane wenang nyada yan sampun kapastika, luwire:
 - ha. sangkan tahunan;
 - ra. yan sampun maderbe pangentos utawi panyeladii;
 - ca. risampun mayusa 65 warsa.
- (5) Sang saking sewosan desa yan sareng tedun makrama desa ring Desa Pakraman Bangkian Sidem, patut keni batu-batu utawi pamogpog, sane agengnya kasulurang manut Pararem.
- (6) Yening wenten krama saking sewosan desa sareng ngranjing makrama desa ring Desa Pakraman Bangkian Sidem, patut kadulurin surat katerangan sane jangkep.

Pawos 6

Wusan dados Krama Desa, luwire:

- (1) Sangkaning:
 - ha. seda;
 - na. pinuras ngraga, menawi magingsir linggih saking wewengkon Desa Pakraman Bangkiansidem;
 - ca. kanorayang, malantaran piwal ring daging awig-awig miwah Pararem Krama Desa, utawi tan satinut ring pituduh Prajuru sajeroning indik nyupat sikian, minakadi nenten prasida ngeschin prawreti;
 - ra. Tata-titine nitenin wusan dados Krama Desa inucap ring ajeng, kasulurang manut Pararem
- (2) Sang wusan dados Krama Desa tan polih pahpahan druwen Desa, miwah tan polih pasayuban malih sajeroning ala ayu.

Pawos 7

Sahanan Krama Desa, patut keni tetegenan utawi ayah-ayah, luwire:

- (1) Ayahan Ngarep, mapiteges paturunan miwah ayahan mamungkul saking Krama Ngarep.
- (2) Ayahan Balu, luwire:
 - ha. Balu Remban, sane pianaknyane kantun alit-alit, punika keni ayahan balu remban sane kasulurang manut Pararem.
 - na. Balu Ngelintik, keni ayah-ayah balu manut balunnyane, yan lanang keni ayahan lanang, yan istri keni ayahan istri.
- (3) Riatakala ngardi wewangunan kabuatan Desa Adat, Kramane, sajaba keni ayahan manut pawos 7, taler keni paturunan sakadi ring sor:
 - ha. Paturunan samawibhaga, manut Pararem;
 - na. Dana Punia, manut kalascaryan sang madana punia.
- (4) Krama Desa, kadadosang:

- la. Mapuangkid utawi tan tedun ngayah/parum :
 - 1). Rikala mapawangunan, nangun yajnya, kaluwasan masengker dewasa ;
 - 2). keni dedawuhan saking Guru Wisesa ;
 - 3). kapialang, luwire : sungkan, matepetin, kalayusekaran, lan sakancan punika.
- na. Dados ngwakilang ring jadma tiosan, sane sampun menek daa/truna.
- ca. Dados mogpog utawi numbas ayahan, prade :
 - 1). dados Pegawai Negeri utawi Pegawai Perusahaan Swasta;
 - 2). magenah ring desa sewosan malantaran ngrereh pakaryan.
- ra. Dados nyeladii utawi nyuksukin Krama Ngarep yan sampun mayusa 17 warsa.

Pawos 8

Kaputusan Krama Tamiu :

- (1) Krama Tamiu, patut madana punia ring Desa Pakraman, manut Pararem.
- (2) Krama Tamiu, patut polih pasayuban marupa pitulung rikenjekan katiben pancabhaya.

Pawos 9

Paturan miwah Leluputan :

- (1) Paturan utawi peson-peson sajeroning ngulati kasukertan Desa Pakraman, kapitegenang ring Krama Desa.
- (2) Desane, maweh leluputan ayah-ayah miwah peson-peson ring sang inggiling linggih miwah sang kawelasarsan.
- (3) Sor singgih leluputan miwah bacakan sang polih leluputan, kaunggulan jeroning Pararem.
- (4) Sajawaning Prajuru Desa, sane taler pastika polih leluputan, luwire :
 - ha. para sadhaka, minakadi Pamangku Kahyangan Desa, lan panyada;
 - na. para serati;
 - ca. sang sungkan tahunan;
 - ra. wong cedangga banget;
 - ka. wong ubuh neme bapa, jantos mayusa 15 warsa.

Palet 2

Indik Prajuru lan Dulun Desa

Pawos 10

- (1) Desa Pakraman puniki, kacenter antuk Prajuru Desa Pakraman, kamanggala antuk Bendesa Adat.
- (2) Prajuru Desa Pakraman, patut:
 - ha. marvit saking Krama Ngarep;

- na. kaadegang Prajuru malantaran antuk pamilihan jeroning Paruman Krama Desa, nyabran kalih warsa, sajawaning wenten pariindikan tiyos, tur sang sampun puputing panumaya, kengin kapilih malih;
- ca. maduluran atur piuning ring Pura Desa.

Pawos 11

- (1) Bendesa Adat, karombo antuk :
 - ha. Panyade, pinaka wakil Bendesa Adat;
 - na. Panyarikan, pinaka Juru Surat;
 - ca. Patengen, pinaka Pangemong Druwen Desa;
 - ra. Kasinoman, pinaka Jurun Gumencang.
- (2) Sajeroning ngenterang kasukertan kaniskala, Bendesa Adat, patut misinggihang Pamangku Kahyangan Desa.
- (3) Prajuru Desa taler ngadegang Dulun Desa utawi Panglingsir, sane sinanggeh Kerta Desa, sane mawit saking Prajuru sane sampun puputing panumaya, sang wikan ring adat miwah agama, Kepala Desa miwah sane lianan, sane kasulurang manut Pararem.

Pawos 12

- (1) Swadharmaning Bendesa Adat, luwire :
 - ha. Ngenterang paruman-paruman Desa.
 - na. Ngenterang panglaksanaan sadaging awig-awig miwah pamutus Krama Desa, sane sinanggeh Pararem.
 - ca. Ngraksa miwah nudonang tata-titine migunayang sarajabrana druwen Desa.
 - ra. Nuntun saha ngenterang Krama desa rawuhing Warga Desa sami, ngupadi kasukertan sekala lan niskala.
 - ka. Nuntun saha nyaksi upacara sangaskaraning kahuripan sane mabuat, minakadi sane ngilitang sulur pakulawargan.
 - da. Nuntun saha ngenterang Warga Desa nginggilang Sang Hyang Agama, kasucian Kahyangan, kasucian Palemahan, kasucian Pawongan, miwah tata-titine migunayang setra.
 - ta. Mawosin miwah niwakang pamutus marep ring wicaran Warga Desa.
 - sa. Ngwakilin Desa, matemuang bebawos ring sapasira ugi.
 - wa. Lan sane sewosan sane wenten pakilitnya ring Desa Desa Pakraman.
- (2) Tata-titine nglaksanayang swadharma inucap ring ajeng, tan maren patut satirut ring daging awig-awig, pararem, dresta miwah pamutus Paruman Krama Desa.
- (3) Panglaksanane inucap ring ajeng patut kasiarang ring Paruman Krama Desa, kapungkuripun.
- (4) Sumakuta utawi sumanggup natak pamutus Paruman Krama Desa, ngeninin swadharman sowang-sowang Prajuru.

Pawos 13

Patias utawi olih-olihan Prajuru Desa Adat, luwire :

ha. luput reramon;

na. luput paturunan marep ring kabuatan Desa Pakraman, manut Pararem.

Pawos 14

- (1) Prajuru Desa, kapilih nyabran kalih warsa, ngawit saking padiwasane kaadegang Prajuru.
- (2) Prajuru Desa sane swadharmannya sampun puputing sengker, kengin kapilih malih.
- (3) Paliindikane ngadegang Prajuru Desa sakaluwire, kapastikayang malarapan Paruman Krama Desa tur kaingkupin antuk Krama Desa.
- (4) Wusan dados Prajuru Desa, sangkaning :
 - ha. lin;
 - na. pinunas ngraga malantaran jalaran sane pastika;
 - ca. swadharmannya sampun puputing sengker;
 - ra. kawusanang utawi kanorayang olih Krama Desa duaning iwang pamargi, menawi nilar sesana.
- (5) Ngentosir, ngwusanang utawi nganorayang Prajuru Desa, patut kamargiang sajerning Paruman Krama Desa, tur kaingkupin antuk Krama Desa.

Palet 3

Indik Kulkul

Pawos 15

- (1) Duanan Kulkul ring Desa Pakraman Bangkiang Sidem, luwire :
 - ha. Kulkul Desa;
 - na. Kulkul Sekaa-sekaa.
- (2) Kulkul Desa, kamanggehang pinaka-piranti utawi sarana tengeran maka wangsit, ring wewengkon wewidangan Desa Pakraman Bangkiang Sidem.
- (3) Tetepakan suaran Kulkul manut dresta, tur anggah-ungguh tetepakanipun, kaunggahang jeroning Pararem.

Pawos 16

- (1) Kulkul Desane, tan wenang katepak yan tan sangkaning pituduh Prajuru, sajawaning tengeran kapancabhayan.
- (2) Sang nepak Kulkul Desa, tan sangkaning pituduh Prajuru, patut digelis atur supeksa maka buatan panepake; yan piwal, sang mamurug wenang katibakin danda, manut Pararem.
- (3) Kulkul Sekaa-sekaa miwah kulkul pondokan-pondokan, tan kalugra nyawerin utawi mabalin sukat miwah tetepakan Kulkul Desane; prade mamurug, sang mamurug taler wenang katibakin danda, manut Pararem.

Palet 4

Indik Paruman

Pawos 17

- (1) Dudonan Paruman ring Desa Pakraman Bangkiang Sidem, luwire :
 - ha. Paruman Krama Desa, kawentenang ngasasih apisan sanangken rahina Redite, Umaris, sane kerihinin antuk tengeran suaran Kulkul.
 - na. Paruman Padgatakala, rehning wenten indik sane dahat mabuat sane pacang kabawosang, sane karihinin antuk tetibak arah-arah.
 - ca. Paruman Prajuru/Dulun Desa, kawentenang manut kabuatan.
 - ra. Paruman Sekaa-sekaa, kawentenang, manut kabuatan.
- (2) Pamargin Paruman Krama Desa, patut nganutin dudonan :
 - ha. Paruman wahu kengin kakawitin sasampune katedunin antuk pinih kedik kalih pah tiga lintang saking sang patut ngamiletin, kamanggala antuk tengeran suaran kulkul, mabusana adat Bali, tan kalugra makta gegawan sakaluwire, karihinin antuk ngarerna Bhagawan Panyarikan majalaran widhi widhana lan cane.
 - na. Maka pangawit, kalaksanayang panyacak pangesepe, karuntutin antuk nyacak dedosan, wahu kalanturang antuk Parum; sasampun parumane puput, patut kacacak malih, tur sane kasep, sang ninggal paruman miwah sane nosa, wenang katibakin danda, sane ageng alitipun, kasulurang manut Pararem.
 - ca. Maka pamastika wahu kengin nyacak pangesepe, kasulurang manut Pararem.
 - ra. Sajeroning paruman tan kalugra ngwetuang wak ghora minakadi ngardi biota; sang maniurug, wenang keni pamidanda bea pacamil, sakadi dandaning anguman-uman ring paseban, sane kasulurang manut Pararem.
 - ka. Pamutus bebawos sane briuk sapanggul utawi ingkup, punika sane kaaptiang tur kamanggehang.
- (3) Prade dagang peparumane nenten kaingkupin, Prajuru Desa mangda ngilikang bebawos, saha pamutusnya mangda kararemin antuk Krama Desa; bilih jantos ping tiga taler nenten prasida kaingkupin, Prajuru Desa dados nunas bawos ring Kerta Desa; bilih pamutus Kerta Desa taler nenten kaingkupin, Prajuru Desa, dados nunasang indike punika ring Sang Maraga Guru Wisesa.

Pawos 18

- (1) Sajeroning Paruman Krama Desa, Bendesa Adat patut nyiarang pamargine ngenterang Desa, panekas ngeninin indik :
 - ha. Munjuk lungsuring gebogan pakraman saha ayah-ayahnyane, minakadi sulur arthabrana druwen Desa.
 - na. Pangrencanan Prajuru, ngeninin utsahan Desane kapungkur.
- (2) Pamutus Paruman Krama Desa sane sinanggeh Pararem, kamanggehang maka p mitegep panglaksanaan awig-awig.

Pawos 19

- (1) Paruman Prajuru Desa, kawenangang wantah ngrincikang pangrencana, marep ring utsahan desane kapungkur.

- (2) Paruman Prajuru Desa, tan kawenang ngamedalang tetegenan ring Krama Desa, saderege kaingkupin antuk Krama Desa.
- (3) Pamutus Paruman Prajuru, kengin ngwetuang pasuara manut daging pituduh sang ngawarat rat, utawi ngonekang pamutus sane pecak sampun dados Pararem Krama Desa.

Palet 5

Indil Druwen Desa

Pawos 20

- (1) Sane kamanggehang dados druwen Desa Pakraman Bangkiangsidem :
 - ha. Kahyangan Desa, luwire :
 - 1). Kahyangan Tiga : Pura Desa, Pura Puseh, Pura Dalem.
 - 2). Kahyangan druwen Desa sewosan ring Kahyangan Tiga, minakadi : Prajapati, Palinggih Pempatan, Palinggih Bale Banjar.
 - na. Bale Banjar.
 - ca. Setra : 15 are.
 - ra. Niasa lan Sasanti.
 - ka. Lekita-lekita : pipil, Awig-awig, Pasuara miwah Pararem.
 - da. Lelangwan, minakadi tetabuhan lan ilen-ilen druwen Desa, luwire :
 - 1). Angklung abarung;
 - 2). Ilen-ilen wali ring pura, minakadi rejang lan pendet.
 - 3). Palawatan Ida Bhatara, marupa : pratima-pratima.
- (2) Olh-olihan Desa Pakraman Bangkiang Sidem, mawit saking :
 - ha. Paturunan saking Krama Desa;
 - na. Paica saking Guru Wisesa;
 - ca. Dana punia tiyosan, sane patut.
- (3) Sanangken Paruman Krama desa, Bendesa Adat patut nyiarang munjuk lungsur upon-upon setra lan sapanunggalannya, sane sinanggeh druwen Desa.
- (4) Upon-upon setra lan sapanunggalannya, kanggen prabca piodalan miwah wewangunan ring pura, taler prabca tiosan marep ring kabuatan Desa Pakraman.
- (5) Sakaluwiring druwen Desa patut wenten lekitannya sane pastika.
- (6) Tan kalagra ngadol utawi ngesahang druwen Desa, yan tan kacumponin antuk Krama Desa sami.

Palet 6

Sukerta Pamitegep

Kaping 1

Karang, Tegal, lan Carik

Pawos 21

- (1) Krama Desa sane ngamong Karang Desa utawi karang paumahan ngraga, patut ngwatesin karangnya sowang-sowang antuk turus utawi pagehan minakadi tembok, mangda pakantenannya asri.
- (2) Watese sane mawasta gegaleng kaluan miwah gegaleng kateben mangda nganutin dresta, tu. kakaryanin olih sang negen wates inucap.
- (3) Prade karasayang pagehan utawi turus inucap nglikadin, yan pada arsa panyandinge, watese kengin nganggen pinget utawi prasihna pal saking Agraria, sakewanten kasaksi antuk Prajuru Desa.
- (4) Prade wenten karang kabebeng, mangda kautsahayang wenten pamesuannya sane pastika.

Pawos 22

- (1) Sinalih unggil Krama Desa, nenten kalugra :
 ha. ngalah-alah margi, karang desa, tegal ayahan desa, tegal utawi carik krama lian, lan sakancan punika;
 na. ngalah-alah tegak kahyangan, setra, lan sakancan tegak sane sinanggeh suci.
- (2) Prade wenten mamurug kecape ring ajeng, sang mamurug, patut ngwaliang tanah inucap, tur sang ngalah-alah tegak suci, tiosan ring ngwaliang tanah tegak suci inucap, taler patut karuntutin antuk dewa danda miwah artha danda, sane kasulurang manut Pararem.

Kaping 2

Pepayonan

Pawos 23

- (1) Ngawit nandur pepayonan minakadi tanem tuwuh, patut adepa agung ngajeroang saking wates; pepayonan minakadi tanem tuwuh sane jantos ngliwat wates, wenang kasepatgantungin.
- (2) Pepayonan sane ngungkulin mawastu mayanin ka pisaga, sang nruwenang pepayonan inucap patut kawara tur kairing mapiguman antuk sang rumasa katetehan, bilih-bilih sang nruwenang arsa ngrebah utawi notor wit pepayonane punika.
- (3) Pradene sampun kawara taler tan wenten utsahan sang nruwenang, sang rumasa katetehan, wenang masadok ring Prajuru, tur risampune kaparitas kandugi wenten lelugrahan Prajuru. wahu wit pepayonane punika kengin karebah, sakewanten panukun patin wit pepayonane punika patut katahur olih sang rumasa katetehan manut panglokikan sang lepasin, tur wit pepayonane sane karebah punika, kasukserah ring sang nruwenang.
- (4) Sang patut keni pamidanda panyangaskara saha prabea manut pararem, marep ring wewangunan sang karuhuan, luwire :
 ha. sang nruwenang wit pepayonan sane sinanggeh mayanin, pradene pungkut tur ngrubuhin wewangunan krama tiosan;
 na. sang notor, monggol utawi ngrebah taru, tur ngrubuhin wewangunan krama tiosan.
- (5) Krama Desa patut agamanggehang kawredian tanem tuwuh sane ngawinang Desane asri tur lestari sane kawastadin Bhuta Hita sane mateses kalestarian lingkungan hidup.
- (6) Sinalih unggil Krama sane pacang ngrebah pepayonan minakadi tanem tuwuh sane ngawinang Desane asri tur lestari, patut masadok ring Prajuru.

Kaping 3

Wewangunan

Pawos 24

- (1) Nyabran ngwangun, sowang-sowang krama patut :
 - 1 a. masadok ring Prajuru, pamekas marep ring wewangunan sane mapanyaitan minakadi mencingin wates.
 - na. ngangge Asta Bhumi miwah gegulak Asta Kosali, sanistannya manut ring patitise ka niskala.
- (2) Prade wewangunan jantos nyayubin ka pisaga, bilih-bilih temboke ring telenging wates, risampune kawara tur kairing mapiguman taler nenten wenten usaha sang nruwenang, kangkat kasadokang ring Prajuru; sasampune kaparitas tur wenten lelugrahan Prajuru, sang nruwenang wenang keni danda manut pararem, tur tembok inucap patut kagubar olih sang nruwenang, sanistannya mangda kakaryanang abangan.

Kaping 4 Wewalungan

Pawos 25

- (1) Sahanan warga desa sane miara wewalungan : bawi, banteng, lan sakancan punika, mangda sayaga nitenin negul minakadi nglogor wewalungannya, mangda nenten ngrusak karang utawi pabianan krama tiosan, bilih-bilih jantos ngranjing ngletchin kahyangan.
- (2) Prade wenten wewalungan sane malumbar utawi ngeleb tur ngrusak karang utawi pabianan krama sewosan, risampune kawara taler nenten wenten usaha sang nruwenang, yan wewalungan punika malih ngrusak karang utawi pabianan krama sewosan, wewalungan inucap kengin kataban, tur sang nruwenang wenang katibakin danda ngwaling panukun wit tetanduran sane karusak, saha nahur panebas pepiaran tetabanan, manut panglokikan Prajuru Desa Pakraman.
- (3) Prade wenten wewalungan ngranjing jantos ngletchin genah suci, minakadi kahyangan, pamarajan lan sakancan punika, risampune kaparitas antuk Prajuru, sang nruwenang wewalungan inucap wenang keni dewa danda lan artha danda, sane agung alitipun manut kecap sastra agama, sane kapikukuh antuk Krama Desa.
- (4) Krama Desane patut nyerayanin wewalungan miwah sarwa prani, tan kapatutang mademang paksi, nuba ulam lan sakancan punika, pinaka sinalih tunggil usaha Krama Desane ngardi Bhuta Hita.
- (5) Sang mamurug kecape ring ajeng, wenang keni danda manut Pararem.

Kaping 5

Bhaya

Pawos 26

- (1) Bacakan bhaya. luwire : jiwabhaya, arthabhaya, agnibhaya, toyabhaya, lindubhaya, lan sakancan punika, sane ketahipun kawastanin Pancabhaya.
- (2) Sinalih tunggil krama sane manggihin prasihna pastika wentene sahanan pancabhaya, patut digelis nepak kulkul tengeran kapancabhayan, tur digelis masadok ring Prajuru.
- (3) Prade Desane kahanan jiwabhaya, Krama Desane patut ngaturang upacara pamahayun Desa manut kecap sastra agama, sane kapikukuh antuk Krama, tur sang ngwetuang jiwabhaya katur ring sang ngawawenang.

Pawos 27

- (1) Sinalih tunggil Krama sane manggihin prasihna pastika wentene arthabhaya (kamalingan), patut digelis nepak kulkul tengeran pamitulung manut pawos 15 (4) utawi pawos 16(1); sang kamalingan patut atur supeksa ring Prajuru; sang kacihnang ngamaling, katur ring sang ngawawenang, maweweh malih patut keni dewa danda lan artha danda manut Pararem Pararem, yanipun ngamaling barang druwen Desa sane sinanggech suci.
- (2) Sowang-sowang Krama Desa tan kapatutang mapailon ring dusta; sang kacihnang mapailonan ring dusta patut katibakin danda kadi dandaning maling, sane kasulurang manut Pararem.
- (3) Indik ngrerch reramon minakadi daun kelapa, ron, miwah sane sewosan ring pabianan krama tiosan rikenjekan suwung, kasulurang manut Pararem.
- (4) Indik ngranjingin pakubon utawi pakarangan krama sewosan rikala suwung, mawastu raris sang madérbe pakubon utawi pakarangan kaicalan, kasulurang manut Pararem.
- (5) Indik ngranjingin pakubon utawi pakarangan krama sewosan rikala suwung riantukan wenten pisarat sane mabuat, minakadi mapangarah miwah kabuatan sane lianan, kasulurang manut Pararem.

Kaping 6

Panyanggran Krama Desa.

Pawos 28

- (1) Krama Desa Pakraman Bangkiang Sidem, patut sareng nyanggra karya suka-dukan sowang-sowang Krama Banjar.
- (2) Tetibak panyanggrane inucap ring ajeng, kasulurang manut Pararem.
- (3) Sowang-sowang Krama Desa sane pacang nangun karya suka-duka sane mabuat, mangda masadok ring Prajuru.

CATURTHAS SARGAH

SUKERTAN TATA AGAMA

Palet 1

Indik Dewa Yajnya

Pawos 29

- (1) Kahyangan-kahyangan panyiwian Krama Desa Pakraman Bangkiang Sidem, luwire :
ha. Kahyangan Tiga : Pura Desa, Pura Puseh, Pura Dalem.
na. Kahyangan-kahyangan panyiwian Krama desa tiosan ring Kahyangan Tiga :
Prajapati, Palinggih Pempatan, Palinggih Bale Banjar.
- (2) Tegak piodalan ring sowang-sowang kahyangan inucap ring ajeng, kamanggehang sakadi ring sor puniki :
ha. Pura Desa/Baleagung, ring rahina Anggara, Kliwon, Dukut.
na. Pura Puseh ring rahina Anggara, Kliwon, Dukut.
ca. Pura Dalem ring rahina Anggara, Kliwon, Tambir.
ra. Palinggih Bale Banjar, ring rahina Wrehaspati, Kliwon, Warigadian.
- (3) Pamargin pangacine ring sowang-sowang kahyang inucap ring ajeng, manut kecap sastra agama, saha kalaksanayang kanista, madhyama, utama, manut kawentenanan krama sane kaingkupin jeroning Pararem.

Pawos 30

- (1) Ring sowang-sowang pura inucap ring ajeng, patut kaadegang Pamangku.
- (2) Fidabdabe ngadegang Pamangku, nganutin dudonan :
ha. ngwilang saking turunan utawi ngwaris;
na. malantaran nyanjan utawi nuhur ring pura sane karerehang Pamangku;
ca. malantaran kapilih antuk Krama Desa.
- (3) Sang tan wenang kaadegang dados Pamangku, luwire :
ha. cedangga, luwire : peceng, perot, cungh, lan sapanunggalannya;
na. sapasira ugi sane nenten kapatutang manut Pararem;
ca. nandang sakit ila, ayan, buduh miwah pinungkan sane tan keneng tinamban;
ra. sang maderbe parilaksana nenten becik.
- (4) Prabea Kapamangkuan :
ha. prabean upakara/upacara adiksa widhi utawi ngwintenang Pamangku,
kamedalin miwah kalaksanayang antuk Krama Desa;
na. marep ring prabean pitra yajnya ring Pamangku, Panyade, yan seda riwekas,
Krama Desane patut maweh dana punia atiwa-tiwa, manut Pararera.
- (5) Pamangku, patut ngamanggehang sesana miwah agem-ageman Pamangku.

Pawos 31

- Swadharmaning Pamangku, luwire :
- ha. ngenterang upacara piodalan ring kahyangan sane kaemponin utawi ring pakubon sowang-sowang krama;
 - na. prade sinalih tunggil Pamangku Kahyangan Desane kapialang utawi cuntaka, kengin nyelang Pamangku Kahyangan Desa tiosan, utawi nuhur sang sulinggih, katitenin antuk Prajuru;
 - ca. yan Pamangku kalayusekaran, wenang anglepas swadharma, kasulurang manut Pararem.
 - ra. yan Pamangku sampun tigang rahina ngayah ring pura sane kaemponin, kancit wenten kulawargannya kalayusekaran, Pamangku inucap tan keneng cuntaka, sakewanten nenten kengin budal salamin piodalan;
 - ka. mungguh tedun ring palinggih-palinggih Kahyangan Desa miwah ngiyasin pralingga- pralingga, manut pamastikan Prajuru.

Pawos 32

- Patias utawi olih-olihan Pamangku, luwire :
- ha. panyolasan miwah sarin canang rikala muput yajnya ring sowang-sowang pakubon krama;
 - na. luput pakaryan miwah reramon;
 - ca. polih apahtigan sarin canang rikala wenten aci ring kahyangan sane kaemponin;
 - ra. indik peson-peson utawi paturunan keni atenga, manut Pararem.

Pawos 33

- (1) Pamangku kagentosin,riantukan :
 - ha. seda;
 - na. pinunas ngraga, menawi kageringan lan sapanunggalannya;
 - ca. kawusanang antuk Krama, riantukan nilar sesanan Pamangku;
- (2) Tatacarane ngadegang miwah ngentosin Pamangku, kasulurang manut Pararem.

Pawos 34

Indik Kasukertan Kahyangan, kadudonang sakadi ring sor puniki :

- (1) Sane nenten kalugra ngranjing ka pura, luwire :
 - ha. Sang katiban cuntaka, minakadi sebel ngraga :
 - 1) sebel kandel ngrajaswala, salami dereng mabresih;
 - 2). sebel antuk ngembasang putra, salami 42 rahina, pateh ring sang karuron;
 - 3). sebel pangantenan, sadereng mabiakala utawi makala-kalaan;
 - 4).sebel riantukan kalayusekaran, jantos puputing sengker sane kaingkupin jeroning Pararem.
 - na. Makta sahanan bebaktan sane sinanggeh ngletehin, manut kecap sastra agama.
 - ca. Sato agung minakadi wewalungan suku pat, sajawaning rikala mapepada.
 - ra. Anak alit saderenge mayusa tigang sasih.
 - ka. Mabusana sane tan manut kadi tatacaraning ngranjing ka pura.

- da. Sadereing polih wak-wakan utawi pituduh saking Prajuru Desa.
- (2) Tata busanane ngranjing ka pura, kasulurang manut Pararem.
 - (3) Pratingkahe tan wenang ring pura, luwire :
 ha. masumpah utawi macoran, sawawaning wit saking pituduh Prajur Desa;
 na. ngamedalang wak pausia utawi wak capala;
 za. mabanyu, makoratan, masesenengan, makolem dados asiki lanang wadon,
 nyangsang busana;
 ra. ngias raga minakadi menahang wastra, menahang pusungan lan sakancan
 punika, sawawaning sang sulinggih miwah pinandita;
 - (4) Sewosan ring Pamangku tan kalugra munggah tedun ring palinggih-palinggih,
 sawawaning wit saking pituduh Prajuru Desa.
 - (5) Sang mamurug kecape ring ajeng, wenang keni dewa danda, manut pamutus
 Pararem.

Pawos 35

- (1) Yan wenten jadma karawuhan ring pura boya saking nyanjan tur ngawinang kramanne
 biapara, wenang keni dewa danda lan artha danda, sane kasulurang manut Pararem.
- (2) Prade Kahyangan Desane kahanan durmanggala minakadi kapancabhayan, Pamangku
 patut digelis masadok ring Prajuru Desa.
- (3) Indik upacara/upacara pamahayun kadurmanggala Kahyangan Desa, mapagamel kecap
 sasura agama, sane kasungkemin olih Krama Desa.

Palet 2

Indik Resi Yajnya

Pawos 36

- (1) Sang pacang madeg sulinggih utawi madwijati patut masadok ring Prajuru Desa miwah
 Parisada Hindu Dharma Indonesia.
- (2) Prajuru Desa patut ngawas lan nitenin tur wenang mialangin, prade kacihnian wenten indik
 sane tan manut kecap sastra agama, tur sareng nyaksi upacara lan upacara padwijatiannya,
 saha ngantur nyiaang jeroning Paruman Krama Desa tegap rawuhing wates kawenangan-
 nya muput yajnya.
- (3) Krama Desa patut madana punia sapamadeg miwah ring panglepas sang sulinggih r'wekas
 katuntun antuk Prajuru Desa.
- (4) Sang sulinggih wenang polih leluputan ayahan miwah peson-peson.

Pawos 37

- (1) Sajeroning muput yajnya, sang sulinggih patut ngutamayang muput yajnya ring
 wewengkon Desa Pakraman Bangkang Sidem, sasampunnya puput, wahu muput yajnya
 ring wewengkon Desa tiosan utawi kadura desa.
- (2) Krama Desane sami, patut sareng ngawas lan nitenin katuntun antuk Prajuru, mangda
 sahanan yajnya sane kalaksanayang olih sowang-sowang Krama Desa, kapuput olih
 Sulinggih utawi Pinandita, manut kawenangannya sowang-sowang.

Palet 3

Indik Pitra Yajnya

Pawos 38

Desa Pakraman Bangkian Sidem, patut sareng nyanggra yan wenten sinalih tunggil krama sane nglaksanayang upacara Pitra Yajnya.

Tatacara panyanggrane inucap ring ajeng, kasulurang manut Pararem.

Dudonan pamargin Pitra Yajnya, luwire :

- 1a. majalaran mendem utawi ngeseng, maka cihna makingsan ring Prethiwi utawi makingsan ring Geni, pinaka dharana antos nuptupang prabea;
- 2a. majalaran upacara pangabenan utawi palebon;
- 3a. riwusan ngaben, patut kalanturang malih antuk upacara mamukur tur karuntutin malih antuk nglinggihang Dewa Pitara.

Pawos 39

Sinalih tunggil krama sane kalayusekaran/atiwa-tiwa, mangda masadok ring Prajuru.

Swadharmaning Krama Desa Adat :

- 1a. Bendesa Adat patut maritatas sang kaduhkitan, napike pacang kapendem, makingsan ring Geni, utawi lantur kaabenang.
- 2a. Prade kapendem, raris kawentenang panepak kulkul tengeran kalayusekaran.
- 3a. Panyanggran Krama Desa salanturnya manut sakadi sane sampun kaunggahang jeroning Pararem, jantos pependemane puput.
- 4a. Prade makingsan ring Geni, panyanggran Krama Desa salanturnya, manut kadi daging Pararem, jantos pamargin upacarane puput.
- 5a. Prade kaabenang, panyanggran Krama Desa salanturnya, manut kadi daging Pararem, jantos pamargin upacarane puput.

Tan kalugra nginepang bangbang.

Desane mawen galah ring sang kalayusekaran sajeroning pitung rahina kengin atiwa-tiwa sajawaning wenten kabuatan tios saking sang yajamana.

Larangan. pependeman miwah palebon ring wewengkon Desa Pakraman Bangkian Sidem kaunggahang jeroning Pararem.

Prade wenten kalayusekaran rikala mamargi piodalan ring Kahyangan Desa, kengin menderi tan pasadok, tur patut ngrereh galah sadhi kala.

Pawos 40

Desa Pakraman Bangkian Sidem, ngamanggehing indik cuntaka, mapagamel ring Panutus Mahasabha Parisada Hindu Dharma Indonesia.

Tatacarane nyulurang kacuntakan, mapagamel ring kecap sastra agama,

kanutang ring drestan desa, sane kaingkupin jeroning Pararem.

Sinalih tunggil krama sane kahanan cuntaka, yan durung utas, tan kalugra

- nyarubin genah suci druwen Desa miwah druwen sowang-sowang krama.
- (4) Sang mamurug, patut keni dewa danda, manut Pararem.
- (5) Sengker utas cuntaka manut kawentenannya, kasulurang sakadi ring sor puniki :
- ha. Kalayusekaran, cuntakannya kaanutang ring drestan desa miwah sastra dresta.
 - na. Ngrajaswala, cuntakannya tigang rahina ngawit saking ngrajaswala, utawi salamining ngrajaswala.
 - ca. Ngembasang putra, cuntakannya abulan pitung rahina ngawit saking putrane embas, ngantos katiwakin upacara tutug kambuhan.
 - ra. Karuron, cuntakannya abulan pitung rahina ngawit saking karuron, ngantos katiwakin tirtha pamrayascita.
 - ka. Pawiwahan, cuntakannya ngantos sampun makala-kalaan.
 - da. Gamia gamana, cuntakannya ngantos sampun kapalasang, karuntutin antuk mrayascita sikian, Desa Adat miwah Kahyangan Desa.
 - ta. Salah timpal, cuntakannya kapuputang manut kecap sastra agama miwah drestan Desa.
 - sa. Anak istri mobot malantaran lokika sanggraha kandugi nenten katiwakin upacara pabiakawonan, cuntakannya ngantos katiwakin upacara pabiakawonan.
 - wa. Anak istri ngembasang putra malantaran lokika sanggraha kandugi pecak nenten katiwakin upacara pabiakawonan miwah widhi widhana, cuntakannya ngantos wenen meras anake alit, karuntutin antuk upacara manut kecap sastra agama.
 - la. Sad atar-iyi, cuntakannya jantos sampun mrayascita sikian miwah ngesehin prawreti.
 - ma. Mamitra ngalang, cuntakannya ngantos katiwakin upacara pabiakawonan.
- (6) Cuntaka kalayusekaran/kapademan :
- ha. Kapendem, cuntakannya :
 - 1). Cuntaka ka Banjar, laminipun tigang rahina ngawit saking wusan mendem, jantos sampun maprayascita (masepuh).
 - 2). Kulawargannya sajeroning pakarangan, manut dresta.
 - na. Kaabelang, cuntakannya :
 - 1). Cuntaka ka Banjar, manut dresta sane kapikukuh antuk Pararem.
 - 2). Cuntakan sang nyambut karya Pitra Yajnya, manut dresta sane kapikukuh antuk Pararem.
- (7) Sang katiben cuntaka, luwire :
- ha. Kalayusekaran, sane cuntaka :
 - 1). sang kalayusekaran;
 - 2). kulawargannya;
 - 3). bebanjarannya.
 - na. Ngrajaswala, sane cuntaka : sang ngrajaswala punika.
 - ca. Ngembasang putra, sane cuntaka : yayah renan sang wahu embas.
 - ra. Pawiwahan, sane cuntaka : sang mawiwaha utawi dampati lanang istri.
 - ka. Karuron, sane cuntaka : sang karuron rawuhing lanangnyane.
 - da. Gamia gamana, sane cuntaka :
 - 1). sang nglaksanayang gamia gamana;
 - 2). Desa Pakramannyane.
 - ta. Salah timpal, sane cuntaka :
 - 1). sang nglaksnayang salah timpal;

sa. Anak istri mobot malantaran lokika sanggraha, kandugi nenten katiwakin upacara pabiakawonan,sane cuntaka : anake istri sane mobot punika.
wa. Anak istri ngembasang putrsa malantaran lokika sanggraha, kandugi pecak nenten katiwakin upacara pabiakawonan miwah widhi widhana,sane cuntaka:

- 1). sang ngembasang putra;
- 2). putrane sane kaembasang.

la. Mamitra ngalang, sane cuntaka : sang nglaksanayang mamitra ngalang punika.
ma. Sad atatayi, sane cuntaka : sang nglaksanayang sad atatayi punika.

(8) Sang tan keneng cuntaka, luwire :

ha. Sang Sulinggih;.

na. Pamangku Kahyangan Tiga, rikala piodalan tur sampun ngayah tigang rahina ring pura sane kaemponin.

Pawos 41

- (1) Pamargin atiwa-tiwa utawi pangabenan kalaksanayang mapagamel kecap sastra agama miwah dresta.
- (2) Peputusan pangabenan, kasulurang manut Pararem.
- (3) Pangingune ring Krama Desa/Banjar, kasulurang manut Pararem.

Palet 4

Indik Manusa Yajnya

Pawos 42

- (1) Krama Desa minakadi Krama Banjar, patut sareng nyanggra miwah nitenin yan wenten sinalih tunggil krama nglaksanayang upacara Manusa Yajnya sane mabuat.
- (2) Tatacara panyanggrane inucap ring ajeng, kasulurang manut Pararem.
- (3) Sang pacang nglaksanayang upacara Manusa Yajnya sane mabuat, mangda masadok ring Prajuru.
- (4) Manusa Yajnya, inggih punika : upacara-upacara dharmaning kahuripan manusa, ngawit saking patemoning kama bang lan kama petak sajeroning garbha, jantos kalayusekaran ri wekas.
- (5) Upacara-upacara inucap ring ajeng, kamargiang : kanista, madhyama, utama, manut kecap sastra agama miwah dresta.

Palet 5

Indik Bhuta Yajnya

Pawos 43

- (1) Desa Pakraman Bangkiang Sidem, patut nyanggra pamargin Bhuta Yajnya, marep ring kabuatan Desa Pakraman Bangkiang Sidem.

kabupaten Desa Pakraman Bangkang Sidem.

Pidabdab pamargin Bhuta Yajnya inucap ring ajeng, mapagamel ring kecap sastra agama kaanutang ring drestan Desa, sane kapikukuh antuk Pararem.

Krama Desa, patut sareng nyanggra yan wenten sinalih tunggil Krama Desa, sane nglaksanayang upacara Bhuta Yajnya sane mabuat.

Sang pacang nglaksanayang upacara Bhuta Yajnya sane mabuat, mangda masadok ring Prajuru.

Pawos 44

Bhuta Yajnya marep ring kabupaten Desa Pakraman minakadi carun sasih miwah sane lianan, kasulurang manut Pararem.

Indik pamargin palelastian utawi makiyis, kasulurang manut Pararem.

Nangken warsa, rikalaning Tilem Sasih Kasanga, Krama Desa Pakraman Bangkang Sidem, patut nglaksanayang Tawur Kasanga, kalanturang antuk pangrupukan, pinaka cihna nyanggra pangrawuh Nawa Saka Warsa (Tahun Baru Saka) ring pananggal apisan Sasih Kadasa, sane kawastanin Nyepi.

Rikalaning Nyepi, sowang-sowang Krama Desa patut ngamargiang Catur Brata Panyepian, inggih punika :

ha. amati geni : tan kengin maapi-api;

na. amati karya : tan kengin nyambut karya;

ca. amati lelangwan : tan kengin maoneng-onengan, ngwijilang suara ghora, nabuh gegambelan, lan sakancan punika;

ra. amati ielungan : tan kengin malelungayan mrika-mriki.

Catur Brata Panyepian punika kamargiang saking semeng jantos benjangne ngedas rahina. (6)

Mangda pamargin Catur Brata Panyepian punika trepti, patut katilikin antuk tetelik Desa sane kawastanin Pacalang Desa, tur sang mamurug patut katiwakin pamidar.da, sane kasulurang manut Pararem.

Benjangne ring pananggal ping kalih Sasih Kadasa, kawastanin Ngembak Geni, sowang-sowang krama patut saling ngaksamayang, sane ketah kawastanin Dharma Santi.

PANCAMAS SARGAH

SUKERTAN TATA PAWONGAN

Palet 1

Indik Pawiwahan

Pawos 45

Krama Desa minakadi Krama Banjar, patut sareng nyanggra miwah nitenin yan wenten sinalih tunggil krama sane nglaksanayang upacara Pawiwahan.

Pamargin Pawiwahan, luwire :

na. malantaran ngrorod utawi marangkat (ngrangkat);

ca. malantaran nyentana utawi nyentana nyeburin.

- (3) Indik Pawiwahan, Desa Pakraman Bangkiang Sidem, ngamanggehang Undang-Undang Nomor 1 Tahun 1974, miwah Peraturan Pemerintah Nomor 9 Tahun 1975, indik Pawiwahan.
- (4) Tatacara panglaksanannya, mapagamel kecap sastra agama, kaanutang ring drestan Desa, sane kapikukuh jeroning Pararem.
- (5) Sinalih tunggil krama sane pacang nglaksanayang upacara Pawiwahan, mangda masadok ring Prajuru.

Palet 2

Indik Nyapihan

Pawos 46

- (1) Prajuru Desa wenang sareng mawosin miwah nitenin yan wenten sinalih tunggil krama sane mapikarsa pacang palas marabi, gumanti nenten kadurusan dados nyapihan.
- (2) Yan krama inucap kukuh ring pakarsannya, Krama Desa minakadi Krama Banjar, nenten sumakuta ring pamarginnya.
- (3) Saderenge pastika polih pamutus saking sang ngawawenang minakadi Sang Rumawos (Pengadilan Negeri), krama inucap manggeh keni tetegenan krama, sakadi nguni.

Palet 3

Indik Sentana

Pawos 47

- (1) Prajuru Desa, wenang sareng mawosin miwah nitenin, yan wenten sinalih tunggil krama sane ngindikan sentana.
- (2) Indik sentana, Desa Pakraman Bangkiang Sidem, ngamanggehang uger-uger jagat minakadi kawicaksanan sang maraga Guru Wisesa, kaanutang ring drestan Desa, sane kapikukuh antuk Pararem.
- (3) Sang pacang ngrajegang sentana, mangda masadok ring Prajuru.

Palet 4

Indik Warisan

Pawos 48

- (1) Prajuru Desa, wenang sareng mawosin miwah nitenin, yan wenten sinalih tunggil krama sane ngindikang warisan.

sane ngindikang warisan.

Indik Warisan, Desa Pakraman Bangkiang Sidem, ngamanggehang uger-uger jagat minakadi kawicaksanan sang maraga Guru Wisesa, kaanutang ring drestan Desa, sane kapikuh antuk Pararem.

Sang pacang ngindikang warisan, mangda masadok ring Prajuru.

SASTHAS SARGAH WICARA LAN PAMIDANDA

Palet 1

Indik Wicara

Pawos 49

Sane wenang mawosin wicara ring wewengkon Desa Pakraman Bangkiang Sidem, inggih punika : Prajuru Desa maka miwah Dulun Desa sane kawastanin Kerta Desa.

Prade sang mawicara tan cumpu ring Pamutus Kerta Desa, kengin nunasang wicaranipun ring Sang Rumawos.

Sahanan sane mawit saking kacorahan sakaluwire, sane sinanggeh nungkasin daging Awig-awig, Pasuara miwah Pararem Krama Desa, patut digelis kabawosin olih Prajuru, nenten nyantos pasadok malih.

Sajaba wicara sakadi ring ajeng, patut nyantosin pasadok sang nunas bawos.

Panepase mangda pastika nyantenang iwang patut malarapan Tripramana, inggih punika: saksi, likita, bukti, tur panepase tan maren nepek ring Catur Dresta.

Palet 2

Indik Pamidanda

Pawos 50

Desane, wenang nibakang pamidanda ring warga Desa sane sisip.

Tetibak pamidanda inucap ring ajeng, kalaksanayang olih Prajuru.

Bacakan pamidanda, luwire :

ha. ayahan panukun kasisipan;

na. artha danda saha panikelnya, miwah panikel paturunan;

ca. rerampagan;

ra. kano,ayang;

ka. kawusanang Makrama Desa;

da. panyangaskara.

Pamidanda sane katiwakang, patut masor singgih, manut kasisipan sakewanten nenten kengin lintang ring pangargan 1000 (siyu) keteng jinah bolong.

Jinah utawi arthabrana pamidanda, ngranjing dados druwen Desa.

Pawos 51

- (1) Krama sane langkungan ring tigang paruman nglantur nenten nahur paturunan miwah dedandan, wenang karampag.
- (2) Tetibak rerampagan, nganutin tatacara sakadi ring sor puniki :
 - ha. Kalaksanayang olih Prajuru, kasarengin antuk krama pinih akeh tigang diri, maka saksi.
 - na. Sang ngrampag patut madarsana rikala ngambil barang minakadi nyawenin tanem tuwuh, sane ageng pangargannya manut ring utang sang karampag.
 - ca. Prajuru patut miteketang mangda barang-barang sane karampag punika digelis katebus masenger awuku, tur ring kutus rahinane pacang kalelang utawi kaadol.
 - ra. Tan keingin ngrampag saluwiring barang sane patut inggilang manut kecap sastra agama, miwah mademang pangupajiwan sang karampag.

Pawos 52

- (1) Prale sang pacang karampag mialangin pamargin rerampagan inucap, mawastu sampun tan nganutin linging awig-awig, krama inucap wenang kanorayang.
- (2) Yan krama inucap manggeh piwal yadiastun sajeroning makudang-kudang paruman sampun kawehin patinget sakewanten manggeh piwal, tan wenten pamargi sewos, sajawaning krama inucap kawusanang Makrama Desa.
- (3) Rerampagan inucap ring ajeng kabawos buntas, risampun sang keni rerampagan punika :
 - ha. Nunas geng rena sinampura ring ajeng Krama Desa, riantukan piwal ring pasubaya sane pecak sampun kararemin.
 - na. Nahur pangargan panguwak pasubaya sadaweg pacang karampag, kadulurin antuk prayascita.

SAPTAMAS SARGAH

NGUWAH-UWUHING AWIG-AWIG

Pawos 53

- (1) Nguwah-uwuhin Awig-awig Desa puniki, wantah kengin kalaksanayang antuk Paruman Krama Desa.
- (2) Pakarsane nguwah-uwuhin punika, mangda mawit saking pakarsan Krama Desa, yadiastun kamedalang antuk sinalih tunggil Prajuru, utawi sinarengan.

Pawos 54

- (1) Sakaluwiring indik sane sampun kamargiang sadereng Awig-awig puniki kasurat, mangda kaanutang ring sadaging Awig-awig puniki.
- (2) Sakaluwir sane durung kasurat sajeroning Awig-awig puniki, menawi kangkat kanggen mitegepin awig-awig puniki, pacang kasurat jeroning Pararem.

ASTAMAS SARGAH

SAMAPTA

Pawos 55

- (1) Awig-awig puniki kawastanin Awig-awig Desa Pakraman Bangkiang Sidem.
- (2) Awig-awig puniki kamargiang ngawit kaingkupin utawi kararemin.

Pawos 56

- (1) Awig-awig puniki kararemin duk rahina : Anggara, Kliwon, Medangsia, pananggal ping 6 Sasih Kenem. Isaka Warsa 1924, tanggal 10 Desember 2002, magenah ring Bale Banjar Bangkiang Sidem.
- (2) Awig-awig puniki kalinggatanganin antuk Bendesa Adat, kasaksinin antuk Kelian Banjar. Dinas miwah Kepala Desa, kawikanin miwah kapikukuh olih sang ngawawenang manut kawenangannya sowang-sowang, tur kapikukuh antuk Murdhaning Pamikukuh : Bupati Tabanan.
- (3) Luwir sang nglinggatanganin :
ha. Kapertama : Prajuru Desa Pakraman:

Bendesa Adat Desa Pakraman Bangkiang Sidem,



na. Kaping kalih : Prajuru Desa Dinas maka saksi :

- 1). Kelihan Dinas Banjar Bangkiang Sidem,



A. A. KOMANG ADIKASTAWA


- 2). Kepala Desa Gunungsalak



A. A. NGH. BUANAYAS

ca. Kaping tiga : Kawikanin olih :

- 1). Ketua PHDI Kecamatan Selemadeg,



I NENGAH WIDEREDA

- 2). Camat Selemadeg,



DRS. N. SAYUN

ra. Kaping pat : Kapikukuh olih :

1). Ketua PHDI Kabupaten Tabanan, 2). PLT Kepala Kantor Departemen Agama


Kabupaten Tabanan,



Drs. I MADE SAMBA



I GUSTI LANANG MUDITA, SH



MURDHANING PAMIKUKUH
BUPATI TABANAN

N. ADI WIRYATAMA, S. SOS

Mengetahui dan telah dicatatkan :

Tanggal : 20 Maret 2003
Reg Nomor : 189 / 27 / Hk



Kepala Bagian Hukum
Setda Kabupaten Tabanan,

I. G. A. PUTU SUMARPATNI, SH

LEPIHAN : I

TETINASAN NYASA LAN SASANTI, DESA PAKRAMAN BANGKIANG SIDEM

Sibeh Bucu Lima, mateges : Desa Pakraman Bangkiang Sidem mapikukuh antuk Pancasila, dasar miwah Darsanan Jagat Republik Indonesia.

Swastika jeroning Padma Asta Dala :

ha. Swastika, mateges : Krama Desa Pakraman Bangkiang Sidem, nyungkemin miwah nginggilang Agama Hindu.

na. Padma Asta Dala, mateges : Krama Desa Pakraman Bangkiang Sidem, misinggihang Asta Aiswaryan Ida Sang Hyang Widhi, inggih punika : Anima, Laghima, Mahima, Prapti, Prakamya, Isitwa, Wasitwa, miwah Yatrakamawasayitwa.

Tios ring punika, sajeroning ngupadi patitis Desa Pakraman Bangkiang Sidem, Prajuru Desa Pakraman Bangkiang Sidem, mapagamel antuk Asta Brata, inggih punika : Indra Brata, Surya Brata, Candra Brata, Yama Brata, Bayu Brata, Kuwera Brata, Agni Brata, maka miwah Baruna Brata.

Gunung, inggih punika Gunung Batukaru, riantukan Desa Pakraman Bangkiang Sidem, magenah ring sampih kelod Gunung Batukaru.

Bajera utawi Genta, mateges : Krama Desa Pakraman Bangkiang Sidem, nyejerang miwah nglimbakang seni, mianakadi : Seni Tabuh, sane mawit saking suaran bajran sang muput yajnya, Seni Suara (Dharma Gita), sane mawit saking pujaan sang muput yajnya, Seni Tari (Igel-igelan), sane mawit saking tetanganan sang muput yajnya.

Dulang madaging Cakepan, mateges : akah Desa Pakraman punika wantah Sastra Agama.

Paçi lan Kapas, mateges : sajeroning ngupadi jagaddhita, sane matiti pangancan antuk Tri Purusa Artha, Krama Desa Pakraman Bangkiang Sidem, tan mari nglimbakang bhoga miwah upabhoga, minakadi sandang pangan.

Ante Tigang Balung, mateges : tiosan ring mapikukuh antuk Pancasila, Desa Pakraman Bangkiang Sidem, taler mapikukuh antuk Tri Hita Karana.

Sasanti : Thani Sakanikang Praja, mateges : sane dados saka utawi adegan Desa Pakraman Bangkiang Sidem, inggih punika : upon-upon pabianan druwen sowang-sowang Krama Desa Pakraman Bangkiang Sidem.

LEPIHAN : II
PANITIA PERUMUS LAN PANYURATAN AWIG-AWIG
DESA PAKRAMAN BANGKIANG SIDEM

-) Ketua : A. A. Putu Putrayana.
) Wakil Ketua : A. A. Komang Adi Kastawa.
) Sekretaris : 1. A. A. Putu Suarsana.
2. A. A. Made Purwa.
) Bendahara : 1. I Wayan Adiyasa.
2. A. A. Putu Armaya.
) Anggota : 1. A. A. Nyoman Cateng.
2. A. A. Made Laba.
3. A. A. Ketut Puji.
4. A. A. Komang Adnyana.
5. A. A. Putu Artawan.
6. I Wayan Sudiarsana.
7. A. A. Putu Abdi Surahman.
8. A. A. Wayan Kompiang.
9. A. A. Putu Suastika.
10. A. A. Sulandra.